



# IrÃn e o camiÃo do medio

## Description



**En Moscova recibíase o martes pasado a unha delegación iraniana para negociar os subministros do combustible nuclear necesario para a posta en marcha da central de Bushire, construída con apoio ruso e que será a primeira planta atómica de Irán.**

Esta semana conclúe o ultimato dado polo Consello de Seguridade da ONU a Irán para suspender o enriquecemento de uranio. Teherán, tanto na súa resposta á iniciativa dos Seis (países do Consello máis Alemaña), como en diferentes declaracións de diversos líderes, deu entender ás claras que pode ofrecer unha *“fórmula nova”* para intentar solucionar as diferenzas pero que, en ningún caso, ten intención de someterse aos ditados das potencias occidentais.

É verdade que Irán pode aínda, antes do 31 de agosto, dar a sorpresa facendo unha concesión de última hora. Pero non é probable. Como tampouco que se extreme máis e suspenda a cooperación coa AIEA ou anuncie a súa retirada do Tratado de Non Proliferación Nuclear. Pola contra, o máis probable é que intente seguir avanzando polo camiño do medio, é dicir, persistir na defensa do seu dereito ao desenvolvemento da enerxía nuclear con fins pacíficos, sen pechar a porta ás negociacións.

Problema? Nin EEUU nin a UE parecen dispostos a xogar con esas regras, secundando as manobras dilatorias de Teherán. Irán quere negociar sen suspender nada, e EEUU quere a suspensión antes de negociar. Washington xa reiterou que despois do 31 de agosto promoverá a adopción de sancións inmediatas. Pero tampouco iso parece moi doado. En canto ao contido, as variables a ter en conta son dúas. Ir pola vía simbólica, prohibindo a participación de Irán nas competicións deportivas ou restrinxindo os voos das súas aeronaves e a concesión de visados aos seus funcionarios; ou impoñer sancións máis substanciais: o embargo de instalacións petroleiras ou aparatos militares, conxelación de bens e contas do goberno iraniano no estranxeiro, etc.

Con todo, a maior dificultade a superar é a diferenza de criterio entre os membros do Consello de Seguridade. Rusia e China non secundarán facilmente as propostas de EEUU. En Moscova recibíase o martes pasado a unha delegación iraniana para negociar os subministros do combustible nuclear necesario para a posta en marcha da central de Bushire, construída con apoio ruso e que será a primeira planta atómica de Irán. E en Pequín, as declaracións oficiais salientan a importancia de arranxar o problema a través de conversas diplomáticas. Ambos países consideran que todo podería ir mellor se EEUU e Irán negociaran directamente un acordo estable para ambas partes. Ese sería o camiño recto.

*Acceso ao artigo orixinal no repositorio web 1998-2012*

**APARTADOSTEMATICOXEOGRAFICOS**

Oriente Medio ARQUIVO

## IDIOMA

Galego

### Date Created

Agosto 28, 2006

### Meta Fields

**Autoria :** 3717

**Datapublicacion :** 2006-08-28 00:00:00